

澹

靜

齋

文

鈔

澹靜齋文鈔外篇卷之二

閩中海峯龔景

請設立鄉官鄉鐸議

竊惟邪教滋事輾轉數年仰仗

皇上天威各股賊匪以次勦淨指日大功告成全境肅清所有善後一切事宜不得不早爲籌備惟是善後者所以豫防後日之患而天下之患常出於所備之外則有不勝其防者矣若不務其本徒計目前之利害在今日視爲萬不可已之要圖而數年之後時移勢易歸於無用是徒勞民而傷財也如人之身偶患瘡瘍既愈之

後亟當調理氣血疏通脈絡正氣充則邪氣自不能入處處皆可無虞如徒戀戀於所患之處前後左右徧敷之藥不獨無益而反有害蓋他日瘡瘍之起不必又在舊處也此次邪教滋事一由於奉宣教化之不明故愚民易爲邪說所惑而不自知一由於奉行保甲之不力故奸民得以肆行其志而無所忌此皆州縣不脩其職之故也然今日之州縣求其稱職也實難何則古之大國不過百里卿大夫士數百人分而理焉猶虞國之不治而今之州縣大者數百里甚者若陝西之西鄉四川之太平大甯周圍千餘里四五千里者矣聖門高第若

冉求之執孔子但許以千室之邑可使爲宰而今之州縣大者數萬戶且有十萬餘戶者矣豈今人之材皆遠過古人耶刑名任之錢穀任之驛站任之捕逃緝盜任之徵糧徵課過餉過犯私鹽私茶私墾私鑄無一不當周知也無一不當躬親也命案多者相驗或歷旬月而不能返署詞訟多者審斷或連晝夜而不敢少休衝途之州縣則勞於迎送困於供支附郭之州縣則疲於奔走瘁於應酬憂貧救過之不暇而欲其爲百姓勸農桑興教化也難矣督責愈亟案牘愈煩處分愈嚴趨避愈巧其有志者瘁精殫神欲以兼綜衆事而未必事之能

精其不肖者遂乃一切棄置日耽逸樂升沈得失聽之
萬一之數此吏治所以日下而民事所以日荒也且州
縣之所用者不過書辦衙役鄉約保正等耳奴隸使之
笞辱及之衣冠之家及鄉黨稍知自愛者皆不屑爲充
此役者非窮困無聊之徒藉此以謀口食則狡悍無賴
之輩假此以遂陰私此豈能分州縣之憂代州縣之事
者舍之則無可用之人任之則非可信之士於是以一
身泛泛然臨於百姓之上其勢既渙然而不相聯其心
亦漠然而不相顧上之情欲達於下而一人之口不能
家喻而戶說也下之情欲達於上而一人之身不能親

至而徧歷也故

德音屢下良瀾美意歲歲及於民而州縣率視爲故事應以具文百姓不沾實惠者非皆州縣不得其人其勢實處於無如何也夫治水者下流通而後上源可得而濬會計者散數理而後總數可得而清今天下之事皆自州縣起州縣壅滯叢脞則內而六部卿寺外而督撫司道雖竭精殫力曷有濟乎竊見成周盛時比閭族黨皆以上士中士下士爲之其制至纖至悉齊之軌里連鄉猶存此意此保甲之所由昉也漢有鄉三老以掌教化十里一亭立之長以司其方之事有嗇夫以主稼穡

有游徼以主徼巡又有求盜以主盜賊其秩皆百石或二百石各任其職朱邑爲桐鄉齋夫其功名乃遠過大司農時亦由得行其志也故成康之時號稱極盛而兩漢吏治民風猶爲近古今州縣所轄之地太廣所理之事太繁似宜倣照其意設立鄉官小州縣四鄉設四員足矣大者酌爲增置所有鄉約保正保長及一村一鎮之長皆屬之以保甲爲先務清查其鄉之戶口田土各爲一冊編列稽查村鎮之長分管其地鄉約保正等各司一事或主催徵或主農桑或主緝捕或主差徭而鄉官總其成簡選壯丁教之技藝農隙以時較閱一鄉之

中戶婚田土雀鼠爭訟爲之剖斷曲直以免小民公庭
守候之累有不決者乃送於州縣酗酒打降賭博宿娼
卽令責懲以其事報州縣每鄉又設鄉鐸一員逢朔望
會同鄉官傳集居民宣講

聖諭祿用方言俚語務期明白易曉俾村僻人民咸知
禮教不敢生事爲非宣講旣畢卽令聽講人民公舉孝
子順孫義夫節婦及素行爲善者書之善冊不孝不悌
所爲不瀟姪酗狡悍者書之惡冊善者一年不變申之
州縣請旌惡者三月不改申之州縣責懲再不悛改照
例充發其有邪說惑民者隨時稟報究辦情親地近日

目易周時時爬梳而甄別之則稂莠之根株悉拔而小民皆興起於爲善村鎮亦各設村鐸鎮鐸均屬之鄉官其所用之人卽所選派耆長堡總皆係家道殷實明白曉事衆所信從之人任事數月頗爲得力今居民各歸村鎮耕作相安不應復存耆長堡總之名其中有生監民人請再選其優者充作鄉官推廣其意卽進士舉人貢生在籍候選爲衆所服者亦準充是選鄉鐸村鐸鎮鐸皆令教官保薦文生貢之品行端方詞旨明暢者充之其勸懲之濇以三年爲率三年之中如與約束有方化導有術人知畏濇案件稀少進士舉人貢生咨部註

用武舉給千總銜廩生準作歲貢增生附生監生給從九品銜武生給外委銜民人給未入流銜再令接管三年始終出力六年限滿卽由該管州縣道府出具切實考語報明兩司保送驗看分別奏咨進士舉人貢生本班先用武舉以千總補用廩生以訓導選用增生附生監生以從九品選用武生以經制外委補用民人以未入流選用貪贓枉濫革其功名照例治罪其有辦理不善及始勤終怠者但令撤退另行揀補然必隆其體統優其禮貌而後有志自好之士可以奮於功名請定進士舉人貢生州縣待之如待同堂縣丞主簿之儀武舉

廩增附武生監生民人州縣待之如待屬員巡檢典史
之儀府道以上待進士舉人貢生如待正印之儀武舉
以下如待佐雜之儀其餘相見倣此待之厚則自待者
不薄而不肯自棄於不材賞之隆則所望者甚奢而不
貪目前之小利生長之地情形素所熟悉則利弊明而
不至戾俗而失宜鄉曲之近耳目衆所昭彰則好惡公
而不蔽任情以自恣其視一鄉之事如一家之事知之
既周爲之必力州縣總其大綱上司核其得失上下相
維臂指相使禁無不止令無不行勸農則野無惰民催
科則里無逋賦興文教則有睦婣任卹之風飭武備則

有伍兩卒旅之衆戶口清而奸宄無所容田疇清而訟
爭無自起興利則利無不興革弊則弊無不革惟上之
所欲爲耳或謂本地之紳衿恐其有所偏徇且或把持
鄉曲則今之才生劣監豪健武斷者正不必爲鄉官名
之爲官衆目所視衆手所指偶有偏私羣起而攻之矣
且州縣所司何事今之書辦衙役鄉約保正皆本地人
也不慮其爲弊而獨慮此乎景瀚之所慮者乾隆四十
六年撒拉逆回平而河州設鎮藝林設叅將四十九年
鹽茶逆回平而靜甯設協石峯堡設守備湖南逆苗平
而延綏設鎮所添之兵皆以萬餘計今湖北增提督陝

西增甯陝一鎮提督移漢中固原又增一鎮四川亦當
有建置所添之兵又當以數萬計 國家億萬年無疆
之業生齒日蕃奸良祿出小有騷動在所不免每次必
以添兵爲善後經費有常歲之所入止有此數其後將
何以爲繼竭天下之全力以養兵無事則坐食以虛糜
國帑及至有事徵調半天下而兵又不敷用乃臨時招
募鄉勇以佐之其費又倍蓰是兩失也今若力行保甲
宣布教化百姓皆有尊君親上之心習於坐作進止之
瀾行之數年簪有成效在城近城之壯丁儼唐時更番
入衛之濶輪直保護倉庫城池則各府州縣之城守營

及分汛防守之兵皆可罷也店舖寺廟關津卡隘稽查嚴密巡邏勤謹奸徒不得托足匪類無從溷入則各營汛坐墩守臺之兵皆可省也卽各路之協營亦可減省惟提督總兵於要害之地擁重兵數千聚而不散合而不分隨時操練隨時教訓隱然有虎豹在山之勢如善奕者一著可以照料一方正不必節節爲防處處安兵也歲可省度支之半取其十分之二以爲鄉官鄉鐸之祿又取其十分之三增州縣之公費俾以暇時置備軍器軍械並犒賞之用府道以農隙閑往較閱申明號令昭示賞罰一旦有警率以殺賊如子弟之衛父兄有不

踴躍爭先者哉明臣王守仁之平甯藩平泃頭桶岡諸賊皆保甲也較之臨時招募鄉勇皆亡命無賴之徒從征則不甚得力遣散則反勞顧慮其相去何如卽較之臨時團練鄉勇心志不一技藝不精其相去又何如此卽古者寓兵於農之制而唐之府兵明之衛所又不足言矣教化行而民不爲賊保甲行而民可爲兵景瀚以爲今日之急務無有過於此者卽將來倘遇不虞其急務亦無有過於此者是誠久遠善後之策也謹議

興安上宜總督說帖

一此次摺內宜將掣回索鎮赴援太平之兵一層補入
紫陽危急情形亦應備細入

告方爲妥協但頭緒繁多未免冗長似應另爲一摺同
時拜發至曹叅將以孤軍當賊匪之衝三次戰功撫
憲並未具 奏似宜詢明敘入以鼓將士之氣

一得勝之後將士未免有輕敵之心更宜十分慎重將
軍山賊匪約有二千餘人又聞其地勢險阻十倍於
安嶺進兵路徑賊砦情形不可不詳爲據聽宜卽日
採訪詳悉繪圖以憑酌辦前此所遣之哨撥兵亦宜

兼用

一將軍山東通椿樹壩西通恆口皆爲賊人後路雖有鄉勇堵截究不足恃今西安滿兵河州兵不日可到似宜分兵兩處嚴爲堵禦然後進兵庶幾不至竄逸以畱後患

一甘州兵旣已止回似應札催索鎮卽速進兵以救紫陽境內百姓之急毋任其沿途藉端逗遛至恆口前日之事業經殺獲多人現在民情安貼卽有一二竄逸鄉勇儘足搜捕何需大兵或聞萬家扒謝排溝等處尙有未靖亦當另派妥幹將弁帶兵二三百名赴

彼鎮壓一以堵截將軍山後路一以搜捕餘孽斷不宜令索鎮久駐於彼

一昨聞有跟差脚櫃隨往軍營看視熱鬧被兵勇認爲賊匪用刀砍傷幸彼時有人認識救護不死然亦細縛解回可知所獻人犯未必皆臨陣所獲其中不無枉濫祈飭委明幹之員細心研鞫一一區別人命至重似亦推廣 聖德之一端也至賊匪之宥可恨者沿途焚燒房屋裹脅良民截去髮辮授以兵器強令入伍編以號布此等被脅之徒當官兵未至之先必不能自行拔出及官兵既至之後勢必至玉石俱焚

幸而生擒詢問所獲之人若並未抗拒傷人束手受縛卽可當時開釋或蹟涉疑似既有髮辯可驗且有鄉保鄰佑可証不妨緩待數日質訊明白再行處分若但謂來自賊營一概正瀆則良民一爲賊脅自知必不生還不如隨賊抗拒得暫偷數日之生堅其從賊之心斷其自新之路反中賊人之計矣且設官本爲斯民旣不能先事豫防又不能臨時救護以致家業爲賊所搶房屋爲賊所占老弱婦女爲賊所殺僅畱子身尙欲殺之於心亦有未忍

一軍瀆賞不踰時兵勇臨陣受傷立時驗明自當卽予

重賞以示鼓勵其有斬首馘耳來獻似宜暫緩交領
兵官及領鄉勇頭目查明方可給賞蓋出力之兵弁
勇壯俱在前敵只顧向前但知殺賊豈有閒暇割耳
割首回來報功後來者遂可割之以冒爲已功且中
鎗中箭中炮被焚而死者不知凡幾死屍遍地何難
割取一二此而失實若遽加獎賞何以服戰士之心
且此風一開臨陣之際士卒皆爭割取首級爲功失
乘勝之勢必誤事機似宜申明號令凡臨陣斬獲本
隊千把報明領兵將官彙送請賞其有掩抑者許其
赴轅喊稟有同伍兵丁可証亦無難判明不必斬首

敲耳紛紛來獻也或所斬係大頭目許其攜帶首級
呈驗

諭各州縣團練鄉勇札

代

照得團練鄉勇保護鄉村地方官隨時扼其勇壯者給予鹽糧帶往本地緊要卡隘扼要防堵迎頭截殺既遇賊匪奔竄之路亦助官兵追討之力誠爲意良濶美本部堂業經通札該廳州縣並委各道府州督辦在案惟恐奉行不善則利民之濶反致累民或假手于吏胥或責成于鄉保濫居簡出不與百姓相見但以籤票從事百姓茫然不知官長意向所在於是宵小之徒得以乘機造作謠言使百姓心生疑懼退避不肯向前抑或急於見長一味刑驅勢迫胥役鄉保勾通劣衿土豪於其

中作奸取利科歛壓派百姓未受其利先受其害種種弊端難以枚指合再明白札示札到該廳州縣務卽遵照先今札示情節親身輕騎減從下鄉每至一處傳齊該處紳士及老年百姓先將

皇上愛民德意宣示明白諭以現在賊匪勢已窮蹙惟因山徑紛歧官兵不能到處堵截爾百姓大家齊心合力卽可立時蕝事與其賊至奔逃房屋什物全然拋棄何如大家努力使賊不敢前來且並不叫爾百姓出征只叫爾百姓自家操練保全自家的身家卽有時地方官帶爾等勇壯的到各卡隘防堵或遇著賊打仗也只

在本境之內同是一州縣管的地方就是鄰里鄉黨遇有緊急豈有不相救援之理而且一離了家就給與鹽菜口糧情理上也是辭不去的除了本境再不調爾等到別處去除了爾父母官也再不準別人調爾等去如此剴切開導百姓豈有不情願之理將此意思說得人明白然後令其推舉一二紳士或身家殷實品行端方爲眾所信服之人爲首領經管此事酌量人戶之眾寡團練壯丁之多少務皆土著不許外來之人混充置備器械時常演習其有奮勇者另行登記以備本地方官隨時帶領救援別鄉別村或帶往本境各卡隘堵剿

之用所有挑選操練造冊等事俱令本鄉所舉之人經
管胥役鄉保皆不得經手鄉村零碎酌量情形附近可
合者併爲一冊辦有頭緒該廳州縣仍不時下鄉點驗
慰勞酌加賞賚以示鼓勵總之殺賊安民本屬地方官
分內之事濶在必行責無可貸本部堂不過總其大綱
而相地勢順民情則在該廳州縣之善爲辦理倘奉行
不善如本部堂所指出各弊端一有訪問定當嚴叅重
究若畏難苟安空文塞責一經答出亦斷不寬貸也毋
違特札

遵

旨擬就條款曉諭官民紳士人等告示

代

爲遵

旨曉諭事照得教匪不瀆擾害生民現經各元戎統領
大兵勦辦無難漸就殲除惟恐官兵追勦緊急賊匪窮
極思逞四散狂奔陝甘南面一帶盡係高山路途紛襍
村落零星官兵勢難一一代爲防護賊匪沿途覓食所
過焚掠百姓多被殘害必須豫爲防範修築堡砦挖濠
溝壕同心協力可保身家賊至則併力守禦使之無可
掠食官兵緊臨其後旬日之內賊必滅亡是既不受賊
匪之害且可助官兵之勢保護閭閻實爲善策前奉

上諭朕聞從前湖北教匪竄劫幸感時經過各處多被焚掠獨隨州一處未被賊擾推原其故因該處民人於賊匪未來之先豫行掘爲深溝堆疊土山賊既不能偷越溝壕擾害村莊而該民人占據土山足資捍衛是村莊守禦既嚴賊匪亦無由肆掠食物復有官兵追蹙其後未有不窮蹙潰散者此亦保護村莊之良濟行之已有成效若川陝河南等省各處村堡俱能照此豫爲防範何至任賊恣意蹂躪乎著傳諭勒保松筠吳熊光等飭令所屬地方曉諭居民相度地形或可仿照辦理令鄉勇人等加意護防堅壁清野以期賊蹤斂戢不敢肆

行侵擾於堵剿機宜自爲有益欽此欽遵當經飭知各州縣遵照出示曉諭督率辦理在案惟恐奉行不善有名無實或急迫而反至騷擾累民或苟且而遂以顛預了事章程不具器械不全終難以資保障而收實效本部堂策集眾議悉心講求擬就條款合行出示曉諭爲此示仰所屬官民紳士人等遵照後開各條實力妥爲辦理其有因時因地當畧爲變通者該地方官及紳士耆民相度情形斟酌損益總期百姓得相保聚不受擾害賊匪無可擄掠易於剿除以仰副

聖主除暴安民之至意各宜凜遵毋違

計開

一立砦須擇寬廣之地以壯聲勢也查每縣可以修砦
地方至多不過一二十處若貪圖近便或二三百戶
輒立一砦非惟地勢不能妥當且人少勢孤賊匪一
至先已心怯終難固守須擇山頂寬平可容男婦萬
餘或數千名者方可修築若限於地勢難容多人必
須分紮亦當於就近連修數砦聲息相通彼此聯絡
庶不爲賊所困

一修砦須極險峻以憑固守也查砦柵不險防守甚難
徒恃人力亦多糜費須擇天險三面陡峻一面可通

行人之處起一嘉祥砦名其三面再爲修削前面路之兩傍俱削成峭壁近砦門二三十步路亦挖斷深二三丈寬丈餘無事安放板橋以通來往有事卽將木板抽撤砦根掘挖壕溝一二道務極深闊砦上週圍砌成堅厚石壘約高四尺許裏面墊高尺餘以便站立守陴

一砦上須有林木水泉以備樵汲也查砦中柴水兩項最爲緊要須砦上有林木可以砍伐爲柴上有水泉可供合砦食用者修築如該處地方並無林木水泉之山砦中平時當多積柴草每家備貯水之器約計

柴水足敷數日之用方可無虞

一安設卡隘以備偵伺也砦堡之外緊要路口設立卡房安設壯健義勇數十名按日輪換可以詰奸細而遠瞭望

一妥擇砦長以專責成也查每砦以千戶論男婦卽不下數千人若無統攝終同烏合須選一家道殷實品行端方明白曉事衆所信從之人或紳士或耆民充爲砦長官予鈐記使總一砦之事一切修築防守事件無論鉅細俱遵指畫其董視工程稽查出入訓練丁壯修飭守備經手鉛藥掌管冊籍以及臨時督催

巡查諸務非砦長一人所能獨任每砦再公舉數人各就所長分任其事以爲副長諸事商明砦長辦理一分派大小首領以便約束也一砦之中除家無丁男及殘廢老弱者概不挑選外其餘每戶計丁之多寡或一人或二三人編爲隊伍十名擇一小領百人擇一大領五百人擇一總領平時派撥妥當同砦長副長注明冊籍一本呈官一本存查止許防守本境並聽地方官調防本縣邊界不許調赴他邑俟有警信砦長傳知總領總領傳知大領大領傳知小領小領傳知各散戶迅速赴砦防守如有一戶不到事過送

官訊究到砦之後砦長凡有指授亦須以次稟承以便各歸約束

一彼此認係以防奸匪濶入也查南山一帶居民土著
寂少誠恐戶口繁多砦長不能一一認識奸良莫辨
平時須令十家互相結保方準入砦如無熟識之人
不許濶入凡入砦之人共若干戶某戶男丁若干女
口若干注明冊籍一本呈官一本存查以備稽核
一蓋房屋以備棲止也查每砦多至萬人或數千人若
無住室勢難露處須於砦牆之內畱空數丈以爲守
禦之地且防賊匪拋擲火彈其餘或瓦房或草屋悉

從其便各量其人數多寡以定房間幾間聽耆長指定地方自行搭蓋懸掛門牌書寫名姓並登記冊籍臨時認牌居住庶免爭執

一製辦火器木石以備轟擊也查臨陣火器爲先而守砦則木石爲要每丁壯千名須備鳥鎗四百桿製造過山鳥鎗二三十桿或四五十桿上鐫某縣某砦字樣排列牆頭砦門多安數桿鉛藥赴官請領牆外緊繫滾木壘石兩三層並多積碎石以便擲擊

一隨時操練以期純熟也查鎗炮必須點放純熟方可得力而刀矛亦必隨時演習每月或二次或三次酌

定日期砦長及各執事副長大小首領與編入壯丁俱赴砦所操練不遵者砦長卽行責處

一糧食不許畱貯故屋以絕賊食也賊匪所到之處必先搜掠糧食糧食盡般入砦賊不得糧不戰自困砦長及副長等平時分督所屬人戶各將所有糧石酌畱數日食用餘俱運入砦中貯於自蓋房間之內食盡赴砦再取

一平時輪流守砦以昭慎重也賊匪未來自不便俱株守砦中以致廢時失業但砦上房屋糧石不可不畱人看守牆壘壕塹亦應隨時修砌須酌畱一二十人

輪班代換砦長副長人等仍不時親往稽查

一臨時須鎮靜嚴肅以一心志也砦中男婦幼孩多至萬餘或數千名口一有賊信易涉張皇喧嘩啼哭徒亂人意以致守陴之人手忙脚亂或鎗炮木石施放太早至得用之時反無可用砦長等須嚴諭婦孺不許喧呼率同副長梭織巡查督令守陴之人執定器械毋許張皇俟賊匪逼近鎗炮可及之時施放鎗炮木石可及之時施放木石不可一時俱發俟賊匪攻撲一面施放一次再撲再放如此兩三次賊匪必不鼓再撲矣

一守宜堅定勿墮賊匪奸計也賊匪遇險峻砦柵難以
攻克卽謊言假道或托詞借糧並矢誓不妄傷一人
鄉民苦無滾識輕信其說遂遭毒害砦長須嚴諭合
砦人等斷不可輕聽其言賊匪又有時故示單弱止
用數百人攻撲卡砦我兵輕其人少出砦追殺賊復
故意奔逃遺棄馬匹衣服等項我兵利其財物跟迹
追搶賊匪大隊翻從後面夾擊或竟搶入砦柵砦長
須嚴約丁壯無論賊之多寡止許在砦轟擊不可出
砦追趕賊匪遺棄什物不可貪利檢取違者砦長卽
時責處

一防宜周密勿令賊匪乘間也賊匪或日間不能得手
往往於四五更我兵疲倦之時或早霧朦朧之候暗
劫卡倫砦長須嚴諭大小首領丁壯人等日間更番
歇息夜間各執器械不得暫離派定所在不許任意
盹睡牆內多掛號燈以備伺警另撥更夫數十名擊
櫓鳴鑼砦長及副長等親身督率巡警毋稍疎懈又
賊匪詭詐多端或向一面攻撲我兵齊赴此面堵禦
賊遂分從他面乘間而入該砦長亦須嚴諭賊匪所
攻一面一面丁壯悉力堵禦其他三面丁壯不得擅
動庶不至顧此失彼

一多設偵探以便防範也查用兵之濶據報爲第一要務每砦須擇心地明白健步善走者數十人於賊匪未至之先梭織往來探聽虛實多寡以便戒備卽賊匪已過之後亦須探明賊蹤果已遠竄方可解嚴

一盤詰宜嚴以防假冒也查賊匪未至之前多扮行商僧道差役營兵或粧作文武員弁或假作難民乞丐探視虛實或大隊不能得手業已繞過卡倫復假扮尾追官兵鄉勇混入砦柵或令我兵下砦諗話往往中其奸計砦長等宜防備如有此等人來砦務須盤問來歷須驗明切實憑據確係官兵鄉勇方可準

其入砦

一小心火燭以防不虞也查砦內草房稠密人煙輻輳且鉛藥俱貯其中火燭一不小心即可延燒淨盡若係夜間更恐誤認賊人刼砦登時潰亂必至自相踐踏砦長須嚴諭在砦人等時刻留意倘或漫不經心卽時責處

一平地村鎮亦應築堡一體防維也查南山一帶崇山固多而平地村鎮市集亦復不少倘商客人等及附近居民於山巔造砦或有不便之處須於本村鎮週圍掘挖壕溝一二道務須深闊內築高厚圍牆其守

禦之灑一如砦柵

一隨時獎賞以示鼓勵也查砦長爲一砦之領袖副長等亦皆勞力勞心如能辦理妥協各地方官卽行稟明酌賞五六品頂戴其總領大小首領丁壯人等如能認真出力著有勞績亦卽隨時稟請優獎以示鼓勵

招諭賊黨告示

代

爲剴切曉諭事照得天地之大何所不有

聖主之心無所不容爾等燒香念經拜師授徒其初何曾有不軌之志悖逆之謀愚魯者不過藉以祈福狡詐者不過藉此騙錢時日積久風聲漸大地方官嚴行查拏胥役鄉保人人訛詐鄰里戚黨有時亦來挾制爾等進則不能辨明退則無可容身不得不藏身山野聚眾自守爲苟延性命之計彼時若有賢能官府開誠曉諭爾等自必悔悟投歸各安生業無如鄉保稟報州縣張皇處處請兵官兵一到玉石俱焚爾等豈能束手待死

不得不持械抗拒遂至殺吏戍官在山旣久蓄糧將盡
不得不下山擄掠遂至放火殺人此等不得已之苦情
久在

聖明洞鑒之中亦本部堂素所深悉者也今爾等滋事
已歷三年父母妻子不能保聚東奔西走風餐露宿畢
竟有何好處爾等之心豈不懊悔祇緣一時失足造孽
已深自知辜在不赦勢如騎虎不能遽下日濕一日得
過且過雖經歷次曉諭爾等終不肯信不知毒蛇惡獸
天地不肯永絕其生逆子頑兒父母不忍遽置之死爾
等雖自外於生成

皇上終以爾爲赤子現在膽黃遍貼爾等當有見聞煌
煌

聖旨豈肯欺騙爾等本督部堂甫經到任若有一語不
實何以管束兩省人民爾等不趁此時歸命投誠自求
生路更待何日爲此剴切曉諭示仰爾等知悉無論被
裹百姓無論真正敎匪持械抗拒卽係逆首斷不輕饒
棄械來投卽係良民斷不妄殺生死關頭只在一念爾
等仔細思量時不可失或投本督部堂行轅或投各將
軍各叅贊營盤或投各府州縣衙門悉聽其便歸鄉者
賞給盤費願住者給貲安插

恩旨具在萬勿疑慮若再執迷不悟現在西北沿邊蒙古各部落及撒拉回子皆告奮勇情願出兵來剿爾等爾等力量能有多大再能抗拒幾時況

皇上待爾等之恩如此高厚爾等尙不悔悟天道亦所不容那時悔之晚矣各自三思凜遵無違特示

催完逋靖拖欠錢糧告示

爲錢糧難容拖欠亟行曉諭速完事照得任土作貢
國家之常經撫字催科有司之專責本縣蒞任伊始心
切愛民但額征銀糧有關國帑催征不力上下均干
嚴例今時值歲暮查核所完銀糧通計不及十分之五
其東北鄉尙完有八九分惟西南二鄉疲玩性成所完
僅三四分按其村莊分算竟有止納一二分者夫糧從
地出在歉收之年蠲免緩徵已沐

皇恩浩蕩今歲幸值豐登不思報德輸將天良何在卽
云地力不齊間有磽薄而一年力作統計收成所獲以

完國課總屬有餘力行節儉早上官糧卽饗殮甫給而一家夫妻父子團圓聚處共享昇平夜臥不驚出入無忌何樂如之乃冥頑罔覺一任追比抗不完納或躲避他方僅畱婦女百計支吾試思差役之追呼爾等豈無花費公庭之敲扑爾等豈非體膚年終歲暮竄伏他處夫妻不得相見父子不得相依所濟幾何終難倖免愚莫愚於此矣揆度爾等之心不過希圖豁免仰待皇恩豈知踐土食毛各有職分自爾祖父以來受恩何等深久區區糧草朝廷所取幾何尙不力圖報効此等居心神明必不福祐爾等試看甘省積欠糧

之人有一能成家立業者否況

朝廷惠愛赤子原爲良民若奸戶頑民必不姑息以長刁風將來卽有

覃恩舊欠斷不能除終須完納積之日久愈見其多更難爲力爾等何苦而必爲此合亟出示剴切曉諭爲此示仰闔邑花戶人等知悉自示之後凡有應完本年額征銀糧草束務於新春上緊照數完交以便趕入三月奏銷各出天良毋貽後悔其中或有隱情如貧民賣地受人勒捐包寫晦數田去而糧存富戶典田暗貼錢糧被人花費名完而實欠或頭人包攬衿士護庇甚或債

主重利剝削收割之時履畊盡收顆粒無存以致輸將無力所有不得已欠糧之故不妨據實指名稟控本縣代爲究追但不許將無作有拖累他人倘玩愒之習不改視爲具文仍然置諸膜外本縣於開印後將西南二鄉按戶清查該戶所欠新舊銀糧出示招人代完卽以該戶承糧地畊不論價值多寡官給印照交與代完之人耕種永遠爲業仍將本戶重加枷責以儆玩違本縣言出灋隨決不姑容代受處分勿謂言之不早也至生監爲民表率更宜急公爲倡如恃符不完律有明條斥革治舉尤不可恕各宜凜遵毋違特示

中衛縣七星渠春工善後事宜稟

某日前隨侍轅下查勘七星渠工程面奉明諭令將明歲春工應辦事宜開摺稟齎齎照中衛河南北諸堡渠凡二十八道惟七星渠爲大灌溉新甯安恩和鳴沙三堡及白馬通灘之田延長一百三十餘里地廣人多心力既不能齊而距縣治遠官又不能常爲經理故自西路同知裁後三十餘年漸次廢弛渠道淤塞閘洞毀壞三堡素稱膏腴之田歲歲苦旱收成歉薄而白馬灘自乾隆二十八年紅柳溝環洞大壞之後得水尤難築壩壓湃所濟不及十之二三二十餘年稍段未見滴水

戶口逃亡田疇荒廢某自去歲履任力爲清釐積弊之區一時未能遽復今歲幸逢憲臺借給渠夫口糧一千三百餘石某親身督率加夫加工改口濬渠竭四十五日之力渠身始能通暢又以普借籽口民力甚舒勉爲勸捐凡諸久廢閘洞俱各修建完固渠水暢流田疇澆足今歲秋收畝爲豐稔現在冬水遍澆明年夏禾亦大有望數堡之民無不感激憲恩歡欣鼓舞惟是已成之功保守爲難百姓狃於一時不計長久旣恐船勤而終怠新任之官情形不熟一年失計轉瞬卽復荒廢伏惟憲臺愛民如子未及回任卽親至甯安鳴沙踏勘情形

某仰體憲仁不敢以卸事在邇諉爲後圖謹將七星渠善後事宜擇其大端詳開清摺呈覽伏祈俯賜採納勒爲章程垂諸永久使歲歲有所遵循則數堡之民永戴鴻慈於不朽矣

今將中衛縣七星渠實在情形及明歲春工善後事宜開摺呈核

計開

一曰修口查七星渠口舊在泉眼山之麓與舊甯安之柳青渠貼渠三口相並康熙四十七年前任西路同知高士鐸改砌以石歷年俱偪得水卽今歲所改之

口也至乾隆年間渠不挑挖漸次淤塞後來委管憚
於濬渠惟知改口漸引而上逼近山河之尾沿河傍
山俱壓石泮沿長六七里民間歲出石料費既不貲
而渠口緊對山河每歲六七月山河泛漲泥沙混濁
全冲入渠一歲之濬不敵一歲之淤以故渠身益高
水不能入某訪諸故老聞離口數百武有栽椿石高
出渠底五六尺往年挑濬以此爲準而遍求不得其
處至高同知舊口砌石之處三十餘年亦無有人知
者今歲二月大加挑濬掘淤三尺始見栽椿石之頂
以水平測量彼時春水尙細河水低於渠身二尺有

餘若挖深八尺使栽椿石出渠口五六尺則得五六尺之水已自足用入夏河漲更復不可勝用因力排衆議復開舊口挑濬四五尺始見當年所砌石底未免高亢蓋相隔六七十年河水日益刷深漸就低落從循舊址水仍不足因令掘去石底再濬二尺有餘與原議八尺之數相符放水之日適當四月初旬河水方漲渠身得七尺有餘之水現在冬水低落渠水尙四五尺較之歷年所改之口既免沿河築湃之費而距山河尙遠又不受泥沙冲突之淤有利無害自今以後所當力爲保守不宜惑於異議復有遷移者

也惟是有口不可無唇今歲于口之下面築迎水湃
丈餘漸就冲坍明歲春工當多備石料斜築五六丈
但不可過爲長大有妨柳青渠貼渠二口則受水更
爲有力永久無患矣

一曰濬渠查七星渠三十年來淤塞已極每歲春工奉
行故事雖有抵濬有名無實白馬灘因環洞壞後歲
不出夫僅藉新甯安恩和鳴沙三舊堡之夫六百餘
名而當差破除已去十分之一劣生頑戶把持抗阻
又居其半委管之不肖者通同舞弊包折夫料庸懦
者則因循不敢過問稍有清正自守羣謀陷害使不

得久以故年甚一年渠高八尺有餘安能得水某于
去春履任親加履勘稔知其弊委管悉行革退不由
地面公舉密訪二人專其責成清查夫役力加督率
雖久廢之工一時未能悉復而白馬灘夏水亦饒十
之八九秋收頗豐成效已可概見今歲仰蒙憲恩借
給渠夫口糧加夫加工某親自督濬通渠用水平測
量竭四十五日之力自新開口至吳石閘長五里渠
身寬七丈挖濬八尺其栽樁石高出渠底五尺有餘
自石閘至正閘長三里渠身寬六丈五尺挖濬八尺
正閘至三空閘長八里渠身寬六丈挖濬六尺三空

閘至宜民閘渠長五里寬五丈挖濬六尺宜民閘至利民閘長七里寬五丈挖濬六尺利民閘至鹽池閘渠長十二里寬四丈挖濬七八尺至三四尺不等鹽池閘至恩和堡大渠橋長十四里寬三丈五尺挖濬三四尺不等橋係舊造橋柱疊三石墩石盤作底以石盤全露爲準大渠橋至小徑溝石洞長八里寬三丈五尺挖濬三四尺不等小徑溝至馮城溝長十里寬三丈挖濬三四尺不等馮城溝至白馬灘新渠口長二里寬二丈七尺挖濬六七尺不等新渠口至白馬灘紅柳溝暗洞至四段渠接入舊渠長六里寬二

丈挖濬四五尺四段渠至渠稍四十六里寬一丈四五尺挖濬三四尺至二三尺不等渠流始能通暢故老皆云三十年來未見此水然夏秋冬水澆灌之後必停泥沙且兩岸新湃亦多坍塌渠身不無淤塞明歲春工又當挑濬方資永久但爲力較省不比今歲之難正閘以上以栽椿石爲準使高出渠底五六尺以水平測量極濬者不過挖至四尺淺者三尺足矣自正閘至鹽池閘近閘之處放水扯泥濬通更易其距閘遠者間段畧爲挑濬不過二三尺鹽池閘以下以大渠橋石墩爲準使石盤底見然後以水平測量

極深者不過三尺淺者一二尺足矣自此至白馬灘稍段渠身愈窄更易爲力白馬灘今歲既獲收成逃亡悉復自當出夫以三百餘名加之三舊堡共一千有餘官爲董率不使生監抗悞委管包折遵照往例以一月之力抵濬自足敷用歲歲守爲常規三堡及白馬通灘必無亢旱之虞矣

一曰修閘閘道之設最有盆于渠工當渠水盛漲無事之時非獨可以減水免冲潰之虞亦且資以扯泥省抵濬之力故各渠閘多者必少淤塞閘少者多致壅阻七星渠至紅柳溝以上向有七閘每歲春工用力

少而成功多素偁得水自三十年來不加修治漸次
廢壞後之委管憚于興修每一閘壞則築土壩代之
水無所洩泥沙沈積渠益高阜以延長一百三十餘
里之渠額夫僅一千零卽使功歸實用一月之力亦
難必其抵濬如式况又有包折脫逃之弊乎某去春
按行諸閘惟吳石閘正閘畧存舊址然已損壞不可
開放其三空宜民利民鹽池諸閘則已基址無存因
令委管以春工餘料先行修建鹽池閘址水已有成
效今歲復力加勸諭戶民各願捐輸新甯安委民王
慎德素偁諳練閘工專令修建諸閘四五月間次第

完竣補修吳石閘一座長六丈六尺寬一丈二尺高
八尺補修正閘一座二空每空寬一丈二尺長十一
丈高一丈三尺重建三空閘一座長十五丈寬一丈
四尺高一丈重建宜民閘一座長二十丈寬一丈四
尺高一丈補修鹽池閘一座長十六丈寬一丈二尺
高一丈二尺補修拖尾閘一座長五丈寬八丈高五
尺俱各完固堅穩放水扯泥大有成效但經年放水
椿石不無衝損每歲補修方可無虞若挨延大壞興
復之費又復不貲今歲十一二月當令委管按行諸
閘及湃岸要工如王家墳圈等處會同士民估計補

修石料椿木應需若干先照田畹豫行派辦明歲正月勒其完交春工一動卽行修治則一年之內可保無虞歲歲如是永永堅固惟利民閘卽蕭家閘地形既削工費浩大今歲以民力已竭畱爲後圖明歲春工再能勸民捐輸統爲興建更爲完善至鹽池閘以下渠長閘少當於小徑溝添建一閘則恩和至鳴沙更無冲決淤塞之虞白馬灘紅柳溝明洞之下渠岸高深人力難施能于里許添建一閘扯泥放水旣利渠身亦大有益于暗洞而沙土性鬆工程亦大又白馬灘之盈甯閘基址雖存亦多損壞皆當以次修建

沙溝三卷之三
三
一時難于並舉所當需之以漸免爲施功者也

一曰修洞七星渠自恩和堡以下南面山水所從出處凡有三四大溝橫過渠身渠水斷流又性挾泥沙所過輒淤渠身四五尺掩濬不易夏秋之間田禾需水宜急山水多于此時暴漲故暗洞環洞之設必不可已也其一爲小徑溝環洞千四十八年冲壞四十九年戶民自行建修上架石槽接引渠流下行山水洞寬一丈三尺長十一丈高一丈五尺其一爲馮城溝暗洞前次係環洞上度渠流下行山水四十八年爲山水冲壞因循未修于溝中築高大土壩以過渠水

山水無處宣洩每遇大雨時行冲壞上下塹岸處處潰缺雖隨時補修而民不堪其苦若大壩一壞則渠水斷流修復之功非一月不可田苗更無所濟今歲某履勘情形會同士民商酌欲復建石環洞須二千餘金費無所出而沿溝上下三四里之渠歲爲山水所冲湃岸單薄處處可虞亦不足恃因于溝之上游地形高阜之處另挖生渠一道灣長四里寬三丈挖濶二丈至一丈不等溝之適中新建石暗洞一座上下俱用石砌長十丈寬一丈五尺高五尺上行山水下接渠流于五月末報竣工程堅固可以數十年無

虞惟新開之渠泮岸鬆泛初過渠水或有崩塌淤塞渠身故今歲舊渠仍復放水以防不虞明歲大壩灣開以洩山水則舊渠不可復用新渠淤塞之處當于春工起夫再爲捭濬濬通則永永暢流矣其一爲紅柳溝暗洞以西爲鳴沙田地溝以東爲白馬灘田地自明季歷國初百餘年七星渠稍至溝而止白馬灘俱爲荒地乾隆元年前任道憲鈕子溝中建環洞五空上度渠流下行山水七星渠接長四十餘里至張恩堡止開墾白馬灘地三萬餘畝招集居人另立新戶分爲十一段民受其利乾隆十六年洞工始有

損壞接次補修至二十八年而大壞白馬灘民屢被
亢旱戶多逃亡田漸荒廢四十二年大修渠工借帑
銀七千餘兩興修以環洞工大乃劈山改渠另開新
渠十里于溝之上游唐馬窰改建石暗洞五月完工
六月卽被山水沖壞通灘仍不得水而借項歲歲徵
收灘民愈困自是以後無敢復議興修惟在溝中築
壩攔水暫資澆灌而五六月田苗急需灌溉之時山
水每至暴發沖決土壩則渠水立斷卽起夫旋卽修
築而山水沖入渠身泥沙壅積渠仍不通捫濬之力
非旬餘不可田苗豈能立待幸而稍通山水復至仍

復冲淤以故白馬灘上四段幸澆一水終難接續歲歲歉收其中四段稍三段則二十餘年未見滴水矣某于去春竭力壓渠口之湃白馬通灘始得澆灌八九而六月後復至斷流歲歲補苴終非長久之策前以通渠高阜三舊堡尙不得水則此洞自屬緩圖今歲幸借渠糧坻挖淤通建洞必不可已而時日已迫工費復大廼會集士民商酌沿四十二年舊址建木暗洞一座採辦既速工費亦省其海墘及東西攔水牆馬頭仍用石砌以資永固木洞中用大柱排列間有損壞歲爲抽換洞底低于前次舊址五尺使海墘

與溝一律平坦山水所過無可冲激自不至毀壞洞
長十丈寬一丈高五尺今歲夏秋渠水暢流白馬灘
秋收更屬豐稔現在冬水亦已澆灌遍足爲數十年
所未有六七月間山水大發數次俱保固無虞從此
灘民可以永享樂利之休矣惟是海墘及東西石牆
歲須修葺膠泥灰料所費亦微當于春工豫爲料理
不可畧有疎忽以致損壞此當責成委管官亦時爲
省視方保無虞此外如通濟洞亦洩山水尙屬堅固
又有乾河溝在稍段向不建洞築壩過水旋冲旋築
不勞大力灘民自能以時整理大抵各溝之水皆源

自本山其勢尙弱惟紅柳溝源自羅山流百餘里
爲猛暴時虞冲決所當密爲防範者也

會勘岷州民王順來控告山地上臬司稟

某于閏四月十七日奉憲檄委令會同岷河二州勘訊
岷州民王順來等控告河州民楊姓等霸佔山地一案
某于五月十二日自循起程曾經報明在案茲于二十
一日至河州南鄉朱家山地方會同署岷州翟牧河州
那牧檢閱舊卷查此案于乾隆五年河民楊伏成等控
岷民王進海私開牧所經劉牧提訊未結王進海卽王
順來之祖也至七年郭牧委王吏目查勘斷給王進海
莊前荒地長一百一十二弓橫八十弓令其開墾承納
河州賦糧其餘山地盡作官荒兩家公同牧放不許開

墾取具兩造遵結在案自此二十年相安無事然其地
本可耕兩家皆有覬覦之心乾隆二十九年三十一年
王印德先後控告楊海楊還倉等私開牧所又經前牧
訊斷丟荒具結在案而私墾者終不能絕至三十五年
鄉約具稟楊朱洪兒等藉熟侵墾官荒前田牧訊查私
開之地計下籽八石有零念其已費工本不忍丟荒給
單令其試種至四十二年葉枝詳請將所納糧石同州
屬試種官地統歸入書院膏火批准在案其時王順來
卽在河具控而楊枝以七年原案王姓僅有莊前一段
之地其楊朱洪兒等所開臥虎山等地與伊無涉且又

詳作書院膏火並非私開斷令各管各業不知七年原
案臥虎等山俱斷作牧牲公地今楊姓旣得開墾則王
姓亦應有分雖係岷民承納河糧亦無不可王順來不
甘因赴岷控告又控憲臺衙門此訟端所由起也五十
一年其姪王守倉又赴憲轅控告奉批蘭鞏二府移委
卑廳同岷河二州會勘前廳因循未辦五十四年前署
河州涂牧委州判袁文揆清查書院膏火地畝加增糧
石楊姓所納之糧由九斗有零增至八石有零其墾地
幾十倍于前而王姓仍不得寸土王順來益不甘心復
控憲轅又批蘭鞏二府飭催會勘歷三四年仍未勘辦

茲奉前因某遂同翟那二牧于次日赴控爭處所逐一
履勘該處有大石山一座坐西向東其前大土山爲臥
虎山臥虎山南引一支爲弔嶺坡前爲打磨嶺又前爲
東嶺王姓舊有岷州糧地在東嶺之下其任莊在打磨
嶺之下其承納河州糧地一段在莊西數十步距弔嶺
坡不遠臥虎山北面之坡亦名大灣陰山過溝爲大灣
陽山又前爲楊姓多羅莊之山楊姓聚族任居多羅莊
其舊有額糧田地卽在莊之前後左右與王姓任莊南
北相望中隔一溝名樹泉河北山自楊姓多羅莊以東
悉係楊姓額糧熟地其多羅莊以西之大灣陽山及臥

虎山之北面爲大灣陰山與臥虎山之東面則乾隆三十
十五年以前皆爲荒地而自三十五年以後楊姓陸續
開墾成熟今之歸入書院膏火田地也南山自王姓住
莊以東悉係熟地然多河州民地王姓田莊僅如彈丸
黑子在東嶺之下打磨嶺之東其南爲東嶺山後係河
州朱家山三社民地東爲河州朱家山小三社民地北
面山根近溝又爲四社楊姓熟地其西卽七年所斷給
莊前之地已認納河州民糧是此地以西之弔嶺坡又
西之臥虎山其爲河地更無疑義至弔嶺坡及臥虎山
之南面西面至今俱屬荒地並未開懇惟弔嶺坡頂上

以至山後則皆河州朱家山三社民熟地也某隨訊問
兩家各無契券又無執照兩造皆無憑據王順來從以
七年原案爲詞然查七年原案但斷給莊前一塊之地
并無以河爲界之語臥虎山及大濟陽山本非王姓之
業何得謂楊姓之霸占而楊姓自四十二年遞增糧石
爲書院膏火俱係河州給單爲憑亦不得謂其種無糧
之地惟七年原案數處皆斷爲牧牲公地自應兩姓公
同開墾而楊姓開墾已連阡陌王姓雖于莊前亦有私
開地段然族少人微終不能越弔嶺坡一步宜其不甘
此則前任河牧心存畛域未免外視岷民辦理不善所

致非楊姓之過也王順來果欲墾種官荒荒地甚多何
難赴河呈請領帖升科或照楊姓之例認納書院膏火
前任河牧亦豈靳而不與乃藉口前斷莊前一段之地
遂欲冒弔嶺坡臥虎山爲己業架捏虛詞屢嘗憲聽其
最急切者有云犁開牛路阻絕咽喉今查弔嶺坡荒地
周圍約十餘里牲畜數萬牧放有餘而臥虎山之頂畱
車路一條直達王姓莊前其後山山腰路寬十餘丈牛
羊經行並無阻礙又云河州分州丈量莊左小草坡令
楊姓開墾查此地卽弔嶺坡荒地檢閱州判原牒並無
令楊姓開墾之文且至今並未耕墾所傳四十二年楊

姓搶奪牛具細打男女則歷年已久人証俱無無從質
訊其餘種種勘訊之下俱係子虛本應坐誣姑念事尙
有因鄉愚無知仰懇憲恩免其責處惟田地參錯界址
易至混淆楊姓既有四社老糧田地又有新墾書院膏
火田地王姓既有岷州老糧田地又有認納河州糧地
俱無四至號數可以稽查彼此影射所種之地不無浮
多隱冒必須徹底丈量水落石出方足以定界限而絕
爭端杜侵欺而昭公允但現在青苗滿地清丈爲難伏
祈憲恩俟秋收後飭令岷河二州將楊姓王姓所有額
糧田地按照糧數文明足額註明四至各立界址以清

兩州之界其餘之地統交河州辦理將楊姓所墾書院
膏火田地及王姓認納河糧田地亦核照糧數文明足
額其有浮多悉令按畝升科此外臥虎山南面西面及
弔嶺坡荒地俱可耕拋荒實爲可惜亦恐后小民覬覦
之心爭端又起臥虎山後通大石山山根一帶儘足牧
放無庸再畱此地爲牧放之所請量畱數丈牛路以爲
牲畜出入其餘悉皆清丈令楊王二姓及附近居民分
段認墾照例升科庶幾地利盡興爭端永息至書院膏
火田雖經詳明但非 奏明豁免之案有租無賦似非
永制今若于租糧之外另加 國賦則徵收太重民不

能堪若改租糧爲 國賦則膏火無資書院必廢亦非

憲臺樂育人才之盛心以某愚見請照甘省山地下則
之例每田一頃徵銀六錢令百姓納租于書院而書院
納銀于州庫則公私兩有裨益是否有當統祈憲臺
核示遵抑某更有請者王順來田莊四面俱係河地距
岷州四站有餘訪之故老云本係河州荒地有岷民黎
姓占墾此地報糧岷州遂爲岷地與岷地並不毗連其
後黎姓將此地半分賣與狄道民王姓卽王順來之先
人也半分賣與河州三社常姓故今常姓亦有岷州之
糧零星錯雜旣不易于稽查而王姓以岷民孤處河地

之中受河民之欺凌亦所不免且明知隔屬關移會勘
有需時日動輒上控以圖拖累請照前此岷州所屬舊
甯河歸併河州管轄之例將岷州糧冊所有王順來及
常姓兩分糧地俱行刪除統歸入河州管轄均屬河民
偶有爭訟河牧無所用其偏護而呼應既靈是非曲直
可以一訊而決亦不至于羈延拖累致滋事端某不揣
愚昧妄陳管見伏祈憲臺裁酌施行除會同岷河二州
另文詳報外合將查勘情形繪圖貼說先行稟聞

臨清守城日記代

乾隆三十九年秋余以臨清州判權知州事適逆匪王倫滋事來犯州城余偕文武官僚嬰城固守十七晝夜會大兵合剿賊眾就殲猥以微勞仰叨

恩遇爰綜始末按日編爲一卷以誌梗概以示子孫云爾

八月二十八日逆匪王倫反于壽張縣知縣沈君齊義死之倫爲縣之黨家庄人以邪教惑眾潛結徒黨謀不軌沈風聞將按捕之機洩倫遂先事起四鼓率眾越城入劫倉庫放獄犯執沈脅降大罵不屈殺之又殺遊擊

趕君福臨清距壽張一百四十里時尙未知也其日逆黨王聖如等反于堂邑縣之張四孤庄縱火殺人以應之

二十九日午刻庄民劉會等奔州治訴其事余以其言稟巡撫徐公績隨同副將葉君信率兵役赴之然猶未知壽張之陷也

九月初一日辰刻至庄民居半被焚死傷甚眾圍王聖如家聖如已逸去獲其黨王經舉等男女二十一人始聞壽張陷署堂邑知縣陳君枚亦至以所獲賊付之同葉副將夜馳回爲防守計

初二日內外戒嚴以緝賊情形申報巡撫

初三日葉副將奉巡撫檄率兵二百赴壽張勦捕是日賊至陽穀奸民內應縣丞劉君希憲典史方君光祀被殺兗州鎮總兵惟公一赴援賊開南門遁

初四日出城撫居民臨清有新舊二城舊城不知何年築周四十餘里民居稠密百貨聚焉然土城已毀敗堵存者僅十分之三勢不可守民情恟懼故撫慰之令徒積聚匿老弱毋爲賊資請兵于巡撫以副將出勦城中無兵也是日賊由陽穀至聊城備禦嚴不敢犯遂闖入堂邑署知縣陳君枚之爲武舉人某與賊格鬪殺十餘

人力不支死陳被執不屈齧而殺之

初五日詣磚板閘令閘官何君士錫斷閘橋撤各渡口船舁臨清關稅置城內以土塞東西北三門團民勇八百餘人與署都司張君宏教諭孟君毓燦訓導李君某吏目范君國樑及諸生王化普許宏緯等分據嚴守是日賊聚堂邑之柳林庄距州城四十餘里

初六日辰刻葉副將率本協兵及撫標兵四十五名自東昌歸余單騎迎之郊于是城中始有兵午刻惟總兵至登城巡視隨奉巡撫檄赴柳林庄合勦

初七日辰刻德州叅將烏君大經率兵一百四十名至

覆王秦州書

代

連接三函並圖說清摺縷析條分形勢瞭如指掌具徵
閣下經緯在曾機宜臆合而撫恤一稟惻怛慈祥之意
溢于字裏行間尤見畱心民瘼休戚與同所謂父母斯
民庶幾不愧披誦再三感慰之餘實深欽佩吾輩受
國厚恩爲地方親民之官守土安民是其專責不得全
恃官兵若賊至不能先事豫防賊退又不能還定安集
自問無以對此心卽無以對

皇上某自入甘境目覩百姓流離景象寢食不安沿途
親行撫慰酌加賞賚而澤未能周催飭王巡道督率委

員分投查勘速行賑恤據僑趕辦詳文調官辦理而日
內尙未齎到今急不能待已就附近所知者選派數員
委令幫辦矣此事以速爲主正如救焚拯溺豈可稍緩
須臾必俟賊匪全出甘境方行核辦斷無此情理而爲
之不力因循觀望文移往返動需旬時嗷嗷待哺之難
民當索之枯魚之肆矣務祈閣下督飭所屬及委員分
投查辦不辭勞瘁趕緊竣事多用一分之心百姓卽受
一分之賜早完一日之功百姓卽得一日之益漢申公
有言爲政不在多言顧力行何如耳尋常無事之時且
然況此被難之民乎爲牧令者患在不知民間之疾苦

賴官吏將弁督率益力鎗箭齊發賊披靡斃百餘人時
防守者東門則外委許致中陳象泰南城則把總王培
進千總王廷佐外委吳珏騏紀雲瑞西城則把總仙鶴
齡陳象坤外委王培承北城則把總仙瑞齡外委郭鑽
也

初十日議民夫守城者給穀一石諸生馬毓嵩郭義治
武生于劍光姬元隆監生李珍各輸米麥供軍辰刻巡
撫批示至李現凌遲處死穆建甫已死戮其屍午刻烏
叅將出城趨惟總兵營請救申刻賊以礮擊南門飛彈
入城聲如餓鴟城上放鎗礮斃賊數十人三更始退以

牛豕犒兵士人益用命募人焚西門外元帝廟劉茂生
首繼下率眾燬之自是賊失避藏之所矣

十一日賊不攻城往來城下時隱時現以耗我藥火自
初七後賊遂蟠據舊城其輜重皆渡河有必得臨清之
勢前隊占副將署逆首占大寺旗竿懸燈遠近皆見之
舖戶劫掠殆盡居民壯健者脅降之擄婦女肆其毒姪
惟回民一隅同心固守未至殘破耳城內居人寥寥無
舖戶固守數日一切俱盡燃燈油代燭裂布條爲繩又
搜民間錫器製鉛彈乃飛書告急並檄鄰封協濟申刻
烏叅將同范縣守備陳臬率兵百名至

十二日惟總兵奉巡撫檄同德州防禦尉格公圖肯率兵五百來援屯城東北之三里庄申刻賊以少賊嘗我我兵分兩翼裹之先鎗後馬斃賊數十人賊三隊冒鎗進我兵却退奔赴東昌入暮沿村放火四鼓進攻南門礮子飛入署擊斫碑石之首官弁等竭力抵禦達旦始退

十三日以錢百千棉衣六百餘領犒兵民夫則給穀外日給饔饍餅粥等物各感奮再告急于巡撫

十四日巡撫檄知得

廷寄大學士舒七額駙拉叅贊大臣阿奉

命領健銳營火器營兵並天津滄州兵來州會剿直隸
總督周河南巡撫何督兵交界攔截堵殺頒到印示分
貼以安民心又奉

廷寄該州已蒙記名事竣引見葉烏記名一等是日賊
于南門外觀音紫等處焚民舍劫典庫奪糧艘排外河
爲橋以作退路附城往來邀遮斲我音耗又以礮攻西
門城上放礮斃賊百餘人

十五日布政司發到火藥火繩鉛彈應十一日之請也
十六日辰刻飛矢著烏泰將幕上余念矢自下而上當
斜不當平今平嵌幕上必賊在高處射也城西南隅外

有高樓與城等賊伏其中窺城中虛實不可不除遂命劉茂生同兵夫縋下燬之殺賊數十人奪軍器無算厚賞以金錢

十七日青州叅將文君壇奉巡撫令領馬兵五十名步兵三百入城協守兵民氣益振取典舖鐵鋤改造鴨舌鎗二百餘桿分給兵夫

十八日城中糧芻盡汪友虞升率壯丁縋城下刈蒿以飼馬監生尹士珠募其嫻賀如杜麥八十石草二萬餘斤率親丁運入城巡撫檄知大軍至州不必供應

十九日伐樹爲薪戍刻賊以大車三滿貯轟藥覆以稽

前護木版賊伏車底挽以行將以燒門用回匪吳地隆
之計也余曰此不可使近門近則城危矣急擲磚石磚
石雨下須臾積尺餘輪礙不得進城中無火箭千總王
廷佐外委紀雲瑞監生尹士珠以棉裹火藥拔帽緯束
之箭頭引以線香再發中其後二車車燬賊棄車走前
車逼城門命兵役縋下搬其柴薪以水潑藥戳死車底
賊六人勞賞如前是日南鄉石槽庄武舉人楊廷鷹糾
鄉勇護村堡賊過其地輒追殺

二十日薪盡拆屋材以供爨巡撫檄知會勦日期內黃
縣傳知河南巡撫何河北鎮總兵黃南陽鎮總兵許各

領兵二千至州會勦直隸總督周令總兵瑪防河西布政使楊西岸防橋

二十一日巡撫檄知秦某奉

旨陞授臨清州知州午刻賊分數隊渡河西北行一隊出水東門南行迎距兩路官軍入夜賊營燈火熒熒

二十二日送識路人赴將軍及巡撫營夜間東南十里外礮聲不絕偵知正定鎮總兵萬公朝興敗賊于清河之北聚圍

二十三日寅刻萬總兵追賊至河西殺賊甚眾焚糧艘斷其逸路忠順營都司張君世富撥鎗手率回兵白虎

回民洪印洪全等與賊戰于三岔河口殺賊二百餘生擒二十七名溺死者數百余請某副將率兵出城應之某猶豫未決已刻巡撫徐引兵至與大學士舒大兵合戰賊于城之東南隅賊大敗有妖婦號五勝老母衣黃舞雙刀驍勇甚至是中箭遁餘賊遁入銅三官廟縱火焚之西北隅別隊京兵遇賊于塔灣少却退至土圍復轉戰殺賊百餘人徐往東南與大營合黃總兵亦領兵至堵截兩間文叅將張都司率兵三百出城焚大寺是夜賊分東西兩路遁皆爲鎗礮擊回

二十四日大霧難民數千奔城下呼號求救哭聲震野

武弁不敢納余曰此皆吾百姓也忍置之死有不測吾任之雖然懼奸民之濶入也開門以兵夾守之壯者不納婦女老弱悉放入散置于各寺廡所給其衣食紳士分主之已刻大營奉

旨誅十二日失機之惟總兵格防禦于軍前將士股慄諸生周書率民姚環等十三人縋城于三里庄擒賊男女二十二人清平縣武舉人徐震川聚鄉勇截殺逃賊獲頭目及黨羽數百人俱獻軍營夜賊焚西南隅民居火光燭天

二十五日大兵攻鍋市獲王聖如及五勝老母殺死無

算焚其巷車

二十六日把總仙鶴齡偵知王倫在故撫臣汪顯宅率兵二十餘垣入至闕誘之降與語突前握其髮賊眾捨死出拔刀砍仙肩項數處兵丁救回午刻巷戰賊登屋放鎗擲瓦以旂指揮我兵以鎗仰擊斃王倫之弟王某又殲其頭目楊五號朴刀元帥者及女賊烏三娘回民四十人獲僞王某僞帥俞鬚子解大營巡撫勞以金粟賊所據舊城與百姓襍處短衢曲巷縱橫分岐出沒無常急之又恐玉石之分也故難以施力然滿漢之兵四面環之賊已無可避矣

三十七日將士率回民按戶搜捕賊黨百餘人逆首猶
凌匿汪宅奉檄埋骸髑清道路三鼓賊欲突圍走鎗礮
擊回

二十八日大兵獲僞帥王貴陳學洙僞先鋒李旺解滔
及各逆家屬大學士舒調葉副將驗其足疾慰勞之
二十九日前知州王君溥至王赴都引

見以事跬誤呈請軍營效力我兵逼汪宅王倫知不免
火內樓自焚死得其手鐲佩劔及衣錦一片獲逆眷頭
目戮其黨數百人

三十日解逆黨王樸孟燦范維閻吉仁王景隆李旺吳

清林于京師

澹靜齋文鈔外篇卷之二終

男璣穀孫福康校字

同里後學林昌彝參校